



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tiryimym@aolima

yt tir yimym

TAPAK 7

Australia-i World Test Championship kokogo

Russia nunger den meyiper rara tenzükogo: Zelenskyy



VOL. XX NO. 239 (ADOK 239) DIMAPUR TENTONÜ (MONDAY)

AAMI (JUNE) 12 2023

₹ 5.00

## NSF-i rongdak Federal Assembly amentsü jateper

**Kohima, June 11, 2023 (TYO):** Naga Students' Federation (NSF) indang Extraordinary Emergency Federal Assembly ka June 13 nü amentsü jateper.

Sendenji aningdang 12:00 ako nung NSF Conference Hall, Kohima nung amentsü, ta NSF Federal Assembly Speaker James Brilliantson Kashung-i metetdaksü.

Iba senden nung NSF dak sendakba onüktem benoka lemsatepsü ta Speaker James-i Federating units, Sub-ordinate Bodies aser NSF Senior Members ajak dang metetdaksü.

Paisa Unit ajak aser bangdak NSF lennir tejen ajak iba senden nung adentsü atemasa mepishia metetdaksü.

## Assam CM-i 'Pits and Potholes' atema DC tem artsü

**Guwahati, June 11, 2023 (Agencies):** Assam Chief Minister Himanta Biswa Sarma-i Deputy Commissioner tem dang gari lenmang nung aser tezülen ongkentem tebilemstü anepaluba masüba atema mepelaba metetdaksü.

CM Sarma-i tzümetsüng atema renemshiba video conference ka alidang Kamrup-Metro District Commissioner (DC) Pallav Gopal Jha-i tzungluruwa aruaka teinyaktsü mapa shitak meinyakba atema artsü.

Paisa DC Jha dang Guwahati nung aliba lenmangtem nung ongken aser tarok aliba ajak nembangtsü mesüra atsdangtsü atema tetuyuba agütsü.

Guwahati kübok Ulubari area nung drainage maparen inyaker aser tzümetsüng arudang nübortemi ongkentem tua aliba mangutsü, ta CM Sarma-i ashi.

Kamrup-Metro DC-i public safety atema mebilemstür. Külen Public Works Department (PWD) ketdangtsüri drainage maparen inyaktsü mapang telatet ka magütsü ta CM Sarma-is ashi.

Dibrugarh nunga National Highway 37 nung lenmang

tezülen ongken ka tua aliba nung Abdul Rahim asüba tatalokba atema CM Sarma-i Deputy Commissioner Biswajit Pegu dang mapa shitak meinyakba ashi.

"Iba lendong ataloker anogo asem tashi süiaka district administration-i teinyaktsü mapa meinyaker. Iba ongken atuba contractor apu asü mapu aser bushisüngdang ka tenzük asü metenzük?" ta paisa astügang.

Nisung taküm ka samaba meyipa magütsütetsü aser tasür kibongi temeten angutsüla. Anungji Deputy Commissioner-i tangsa mapa inyaktsü ayongzüker, ta Sarma-isa metetdaksü.

Tanü CM Sarma-i Dibrugarh o Kamrup Metro Deputy Commissioner tem artsüba sülen Kamrup Metropolitan District Administration-i number ana metetdaksü.

"Guwahati nung alirtemi tsünglanglen agüja aliba number nung damaged roads/ open pits/ dugouts osang metetdaksütsü mepishir" ta District Administration-i ashi.

Control Room: 1077 & 9365429314 (phone/WhatsApp)

## Dimapur nung tesema aika tzü agi metsümbang



June 11, 2023 nü Dimapur nung kiyong kar tzü agi metsümbanger alidang agiba noksa angur.

**Dimapur, June 11, 2023 (TYO):** Deobarnep züngia Dimapur nung tzunglu kanga aruba ajanga tesema aika tzü agi metsümbanga liasü aser iba ajanga kibong aika timtemer.

Dimapur kübok Burma camp, D colony (Kuda village), Naga Shopping Arcade, Zeliangrong

colony aser Netaji colony nung tzümetsüng timtem ajuruba osang angazüker.

Tesem kar nungbo tzü agi gari lenmang ajanga mobang aser Dimapur Town Hall sülen aniba private bus station ajunga metsümbanga liasü.

Tanü colony kar nung NGOs

aser lanur teloktemi timtem ajururtem den yaritep aser chiyungtsü agütsü.

District Disaster Management Authority-i osang metetpeladar saka tzümetsüng ajanga takoksa anguba osang tejangja metettsü asoshi mapang agütsü ta DDMA ketdangtsü kati ashi.

## DoSE-i Tuensang nung admission peria mesütetba jangjashitsür

**Kohima, June 11, 2023 (TYO):** Government Higher Secondary School, Thangjam nung yakta classroom tasen 4 yanglutsü aser classroom 8 yanglushitsü ta Department of School Education, Nagaland-i metetdaksü.

Tuensang nung Class 11 kaketshirtem atema admission peria manguba dak sendakba nung DoSE principal director Thavaseelan K-i tanü iba osang metetdaksü.

Classroom tasen yanglutsü aser tejen yanglushitsüba atema May nung work orders agütsügo ta pai ashi.

Tuensang District kübok GHSS Tuensang ya Light House School ka asütsü shimtet. Iba ya World Bank-i teyari agütsüba NECTAR Project kübok lir aser infrastructure maparen aika inyaktsü, ta Thavaseelan-i ashi.

Taruba State Level Education Committee (SLEC) senden nung Government High School, Hakushang GHSS jenjanga ajungkettsü atema benoka lemsatepsü, ta paisa ashi.

SLEC-i mulung agizükra Department-i P&AR aser Finance Department tem nungi clearance/approval/concurrence nungdaksü. Iba ya post creation/

conversion atema asütsü aser iba sülen Cabinet dangi abentsü. Maparen ajak tembangba sülen NPSC ajanga PGTs shimtsü aser iba maparen inyaktsü atema küm ka tema agütsü, ta Thavaseelan-isa metetdaksü.

GHSS, Tuensang aser GHSS, Thangjam nung PGTs talila nungdakba atema Department-i tawa tu school anaprong nung nungdakba PGTs mapa lezmüksügo, ta DoSE principal director-isa ashi.

Maneni, tang teinyakdak recruitment process tembangba sülen PGTs lemsashitsü, ta paisa ashi.

## Kuki tsürtemi tasürtem bilemteta tushi



**New Delhi, June 11, 2023 (Agencies):** Manipur nungi Kuki tsürtemi Honibarnü New Delhi nung shimo milen tsükloker Manipur lendong nung asürtem bilemteta tetushi agütsügo.

Kuki tsürtemi Jantar Mantar nung adenshia iba sentong nung shilem agia liasü. Parnokisa Prime Minister Narendra Modi dangi züluba memorandum ka nung Manipur tensa süngjemtsü atema mapa inyaktsü mepishia metetdaksügo.

Kuki tsürtemi PM Modi dang Manipur nung President's rule benoktsü, ketdangtsübalala lemdangtsü, mepetmesü aliba tesemtem nung central forces & neutral officers talila mapa

lemzüksüts aser mortuary o hospitals nung security agütsütsü atema takhangba agütsügo.

Kuki tsürtemisa security, food aser medical aid meshiogo.

"May 3 nungi tenzükka Manipur nung tensa mejungi lir aser joko ita ka tema süir. Home Minister Amit Shah-i state semdangba aser tensa süngjemtsü temepishiba agüjaka ozüing alema inyakba manener. Anogo ishika tejekdang tetsü aser jabaso na rongset. Onoki shiba dak ang temulung alemtsü'ar ratar" ta Kuki Women's Forum züngsem kati ashi.

"Onoki Prime Minister aser Home Minister na dang tensa tamajung mekümdaksüi sottsü mepishir" ta laisa ashi.

## Manipur nung internet services maneni shibanger

**Imphal, June 11, 2023 (Agencies):** Manipur sorkari June 15 tashi internet services shibangtsü osang metetdaksügo.

"June 15 nikongdang 3:00 ako tashi broadband dena mobile data services maneni shibangtsü" ta Commissioner (Home) T Ranjit Singh-i ashi.

Manipur state sorkari internet shibangba anema Manipur nung nisung anati Supreme Court nung temepishiba ka benok saka magizükba sülen sorkari iba tetuyuba agütsügo.

May 3, 2023 nü Meitei aser Kuki nunger tsüngda mepetmesü adokba sülen nungi Manipur nung internet services shibanga liasü.

Ozüng alema inyaksangshirtemi social media

ajanga tesempatep adoktsüsa osangtem, video messages prokshitsü akok aser iba ajanga law & order tensa mejungi akümtsü ta Commissioner (Home)-i metetdaksü.

Manipur nung kin o kin tsüngda mepetmesü adokba sülen nisung 50,000 tema relief camps 349 nung jenoka lir ta state sorkari ashi.

District ajak nung combing operations tenzükogo ta Manipur Information and Public Relations Minister Dr R K Ranjan-i ashi.

"Kin o kin rara ajanga nisung 50,698 tashi relief camps 349 nung jenoka lir" ta minister-isa ashi.

Külen, district aser cluster nodal officers dang tetsürtem, taintem aser tanurtem atema lapokba relief centres ketdangtsü

reprangtsü mapa lezmüksügo.

Manipur nung lendong atalokba bushisüngdangtsü atema Central Bureau of Investigation (CBI)-i züngsem 10 agi akümba special investigation team (SIT) ka tentetogo.

CBI-i bushisüngdangba maparen ya Commission of Inquiry kati reprangtsü. Iba Commission ya Gauhati High Court nung taoba chief justice Ajai Lamba lenisüba kübok lir. Union Home Minister Amit Shah-i Manipur semdangba sülen commission ya tentet.

Centre sorkarisa Manipur Governor Anusuiya Uikey menden ser peace committee ka tentetogo. Iba luden nung chief minister, state ministers, MPs, MLAs aser political party balala lennirtem dena lir.

### Mandir Sanchalan Samity, Sarvajanik Gorkha Mandir-i kaketshirtem tushi



**Mokokchung, 11th June (TYO):** 11th June nü Mandir Sanchalan Samity, Sarvajanik Gorkha Mandir-i Gorkha kaketshir HSLC & HSSLC tatidang nung takok tajung angur nem tenüngsang agütsüba sentong ka Gorkha Community hall, Mokokchung nung ayongzüka kaogo.

Iba sentong nung senpet (Award) ana agütsü. Mezüngbubaji Gorkha kaketshir rongnung HSSLC tatidang nung tematiba marks angur nem Late

Smt. Man Maya Rai, Merit Cash Award Rs 10,000/- agütsü. Iba award ya taküm agi joko küm 12 buba agüja arur.

Tanabuba Award-ji HSLC tatidang nung Gorkha kaketshirtem rongnung marks teimtiba angur nem B.B Gurung Merit Cash Award Rs 10,000/- agütsü. Iba award ya taküm küm nungi tenzüker aser ibai asür B.B Gurung nüngtem par kinungertemi agütsür. B.B Gurung ya Gorkha nunger rongnung dang masü saka

Mokokchung town renlokba nung shilem agir nüngtugu nübu ka aser pa ya tesayur tajung ka liasü.

Iba award agütsüba sentong den külemi class 10 aser 12 nung 1st position angur kar nem tenüngsang kulikaket kaka agüja tepela sayua liasü.

Gorkha Union Mokokchung tir, Prahlad Gurung aser Mandir Sanchalan Samity Advisor, Ranbir Thapa nati mapang tatsütsü agia tepela o den tayongzüka o tulu bener arua kaketshirtem ayongzüük.

### HSLC & HSSLC tatidang nung takok angur nem tenüngsang agütsür: NSCN/GPRN

**Dimapur, Aami/June 11 (TYO):** Nagaland Board of School Education (NBSE) ajanga agiba High School Leaving Certificate (HSLC) aser Higher Secondary School Leaving Certificate (HSSLC) tatidang nung takok anguba kaketshir ajak den Ministry of

Education, GPRN ajanga tepela lemsateper, ta MIP, NSCN/GPRN sangdong ka ajanga ashi.

Nenoki takok anguba atema pelaba lemsateper aser nenok tarutsü wadang nunga tajungtiba südakjang ta moatsür. Ano linük tenzüker

chirtemi takok anguba, talisa "Top 20" jenjang tongteter nem tenüngsang agütsür.

Nenok mangdang asangsang kuma aser Naga nüburtem tejakleni aniba nung shilem agütsü NSCN/GPRN teimla lir. Tsüngremi nenok ajak moajang, ta sangdong ajangasa ashi.

### MKG nung Health Awareness Seminar agi



Mokokchung nung Health Awareness Seminar agidang tangokba noksa angur

**Dimapur, Aami/June 11 (TYO):** Sangtam Baptist Church, Mokokchung nung June 10 nü Health Awareness Seminar ka kaogo. Iba sentong ya Department of Health & Family Welfare Mokokchung-i teyari agüja ENPUM-i ayongzüka agiogo.

Lokti plela agizükba o jembiba mapang N Chuba Phom, Asstt. Planning Officer Mokokchung-i sentong nung shilem agirtem dang iba seminar nung sayubatem takok tashi angazüktsü aser tangazükbatem pei lokti den lemsateptsü ayongzüka liasü.

Okila jembiba mapang Dr. Kibangkumba, Chief Medical Officer Mokokchung-i, anema alibaji rongsen ta ashiba den

seminar nung shilem agirtem dang Awareness seminar nung shilen sayurtemi health dak sendakba nung tangazükba balala agütsüba dak rangloker shilem agütsü ajungshia liasü.

Paisa, tanü tendank nung health dak sendakba nung tebilemstü balala ya jelia jenjang tapet agiba aser shisatsü agizükba ajanga tajemba kümdaktsür ta ashi. Paisa, sentong nung shilem agirtem dang parnoki awareness seminar nung angazükbatem ya pei kinungetem den dang masü saka pei yimtsüng nung health dak sendakba nung onük balala mejangjai alirtem den lemsateptsü ayongzüka liasü.

Seminar nung tetsür tanur abenba aser asoba dak

sendakba nung ANC & PNC, institutional deliveries & Govt. Schemes & High Risk pregnancies, Importance of Immunization & AEFI, Exclusive breastfeeding & complimentary breast feeding aser early childhood diseases, Family planning (spacing) aser community process (NCD, role of ASHAs) amala onük balala dak ajemdaker tangazükba agüja liasü.

Seminar nung shisalen sayurtemi Dr. Supongmeren, Sr. Specialist Obs & Gynae IMDH, Dr. Imlisenba, Peadiatrician IMDH aser Matsungshila CHO Longkong nunger liasü.

Iba awareness seminar ya Watisenla Jamir, DCM NHM lenisüba nung agia liasü.

### Niuland nung mejangjaba nisung tasü mang ka ngutet

**Dimapur, Aami/June 11 (TYO):** Mejangjaba nisung (tetsür) tasü mang ka Lotovi village, Niuland nung nylon lisü ka nung sangzüa aliba June 10, 2023 nü ngutet, ta Dimapur Police sangdong ka ajanga ashi.

Iba tasü mang ya shizüka orr liasü aser tasü mang nung aben süoshi nung ajemdaker la ya non-local nisung südi ta temolung melemteti lir.

Ozüng agi melaba maparen

ajak tembangba sülen tasü mang ya PM examination/jangjatsü atema Dimapur District Hospital Morgue nung yua lir.

Iba nisung ya anüngsentsü tula ka aser sari temeremso nung temesüng keter aliba agir liasü.

Kibur/kinunger/tembar temi Officer-in-Charge, Women Police Station, Dimapur den Mobile No. 7085055027 aajanga tongteprateptsü akok, ta sangdong ajanga ashi.

### Assam Rifles temi state nung sentong balala ayongzüük



**Dimapur, Aami/June 11 (TYO):** IGAR (North) kübok Assam Rifles, Kohima Battalion ajanga June 9, 2023 nü International Yoga Day nüngtem nung sentong balala ayongzüka liasü.

Iba anogo nung parnoki Fern Wood Higher Secondary School, Kohima nung painting competition ka ayongzüka liasü.

Iba sentong nung class balala nungi kaketshir 58 tejangraba tulu nung arua shilem agia liasü. Yoga aser ibaji ajanga temang nung tajangzüük anguba indang painting ya kaketshirtem asoshi tang mezüngbuba liasü.

Iba tetoktepa nung takok angurtem nem June 15, 2023 nü IG Stadium Kohima nung Mass Yoga Practice alidang sempet agütsütsü.

Maneni "Yoga Utsav of upcoming 9th International Yoga Day 2023" nung shilem ka ama

IGAR (N) kübok Assam Rifles temi Peren district kübok Jalukie nung June 9, 2023 nü Yoga Capsule sentong ka ayongzüka liasü.

Sepaitem takum nung yoga yimyatam amshitsü aser yimya sübadaktsütsü ajungmesoa iba sentong ya ayongzüka liasü.

Iba sentong nung Yoga asanas balala amshiba ajanga tekolok aser temang nung teyari agütsüba indang awareness agüja liasü.

Temang aser tekolok anema yutsüba nung yariba Yoga posture aser tango sashiba yimyatema sepaitem nem angazükdakja liasü.

Maneni Yoga ajanga temang nung tashi agütsüba, temang yimya balala nung atsüshiba aser nguyangushi anepba indang yimyatam sayua liasü.

Iba sentong nung Assam Rifles züngsem 154 dena liasü.

### SHGs tem tashi aittsü sentong ka Old Showuba nung ayongzüük

**Dimapur, Aami/June 11 (TYO):** Nagaland Rural Livelihoods Mission (NSRLM)

kübok KK Cluster Level Federation ajanga Self Help Groups (SHGs) pur asoshi anogo ka training sentong "Vision of 2028" omen nung ajemdaker Honibarnü ayongzüka liasü. Iba training nung telok 11 arua aden, koba Old Showuba village, Dimapur nung aliba Bethel Baptist School nung ayongzüka liasü.

Iba sentong indang omen "Vision of 2028" tetetzü ya tang nungi tenzüka küm pongu tsüngta lenirtemi pei takum, kibong aser yimtsüng tia asadangtsü asoshi lir.

KK Cluster Level Federation indang secretary, Atsula-i tarur pela agizükba o jembiba sentong tenzüker aser Nagaland nung SHGs tem

renlokdaaktsütsü asoshi lai angatetba lemsatepa liasü.

Shisalen sayur temi SHGs ajunga dang parnok income timba kumdaaktsütsü, parnok takum aliba jenjang tajungba kumdaaktsütsü aser lokti nung jenjang ajungkettsü asoshi külemi amteper inyatsü ajungshia liasü.

SHG balala tsüngta skills, capacity aser telungjem tali akangshidaktsütsü nükjidong nung maparen balala inyakba mapang telok ajak nem chart yanglua "Happy Family; Happy Woman; Happy Village" nung parnok tangatetba zülutsü nungloktsü.

Activity tanabuba nung SHGs tem tsüngta tashi itsütsü aser lungjemshitsü atema aser züngsem ajak tebung ka kuma alangtsü asoshi züngsem ajunga nem angzü lema agüja liasü.



June 11, 2023 nù Bengaluru nung Karnataka Chief Minister, Siddaramaiah aser Deputy Chief Minister. D K Shivakumar nati tetsürtem atema 'Shakti' scheme tenzüksüdang tangokba noksa nung angur. Iba scheme kübok tetsürtemi bus nung angati senzüsü.

### June 15 nü cyclone 'Biparjoy' Gujarat tzüyimkü atongtsü: IMD

**New Delhi, June 11 (Agencies):** "Biparjoy" ta ajaba cyclone yipru mopung ano kanga tesashiba kümogo aser June 15 nü Gujarat kübok Kutch district aser Pakistan kübok Karachi tsüingda tzüyimkü atongtsüa akok, ta Amongnü India Meteorological Department (IMD)-i metetdaksü.

Meteorological office-i Saurashtra aser Kutch tzüyimkümlen tekümdangtsü metetdaksüogo.

IMD-i sangdong ka ajanga, "Yipru mopung tesashi 'Biparjoy' east-central Arabian Sea nung aliba north-north-east tsütsüleni ghonda ka nung kiloameter 9 kera ondar, aser iba yipru tesashiba küma anepdang 05:30 ako meta kasa region nung Mumbai nungi kilometer 580, Porbandar nungi kilometer 480, Dwarka nungi kilometer 530, Naliya nungi kilometer 610 aser Karachi (Pakistan) nungi kilometer 780

shi pilar liasü," ta metetdaksü. June 14 anepdang tashi iba cyclone ya north tsütsüleni aontsü, iba sülen north-northeast tsütsüleni ona June 15 anüingdang Saurashtra aser Kutch aser anasa Pakistan tzüyimkümlen Mandvi (Gujarat) aser Karachi (Pakistan) tsüingda tzüküm atongtsü aser iba mapang nungji mopung ghonda ka nung kilometer 125-135 nungi kilometer 150 tashi kera aontsü," ta metetdaksü.

IMD nung Senior Scientist, DS Pai-i, iba cyclone agi koba tesem atongtsüar ibajibo taruba anogo ishika tsüingda nung ang jangjatsü, ta metetdaksü.

Ano tanga osang ka nung, Amongnü Union Home Secretary, Ajay Bhalla-i Centre sorkar nungi tongti ketdangsertem aser Gujarat nungi tongti ketdangsertem den senden mena iba cyclone atema terenemshiba jenjang asadangogo.

Union home secretary

mendenbuba ser National Executive Committee senden mena central ministries, agencies aser Gujarat sorkar den iba lendong atema terenemshiba jenjang asadangogo, ta Home Ministry nungi otongdar kati metetdaksü.

Disaster Management Act kübok linük nung tzi-mopung lendong dak sendakba lendong balala nungi nüburtem aser kiojen kümzüksü asoshi mapatong balala benoka renemshitsüji National Executive Committee mapa lir.

Gujarat sorkar den yariteptsü atema National Disaster Response Force, Army, Navy, Air Force aser Coast Guard yokogo.

Kasa senden nungji Gujarat chief secretary den central ministries aser agencies nungi ketdangsertem, India Meteorological Department (IMD) aser National Disaster Response Force (NDRF) nungi tongti ketdangsertem-a denogo.

### Party bangdaki dang CM candidate shimmer: CM Bhupesh Baghel

**New Delhi, June 11 (Agencies):** Taküm küm tatembanglen Chhattisgarh den tanga state pezü nung assembly elections agitsü lia Chhattisgarh chief minister, Bhupesh Baghel-i, teti agia Congress-i chief minister teinyakdak lenisüba nung elections nung tokteper, ajisüaka CM candidate ji party bangdak-i dang shimtsü, ta metetdaksü.

Küm ana tejaklen tang Health Minister teinyakdak, TS Singh Deo-i Chief Minister menden ya Baghel tena tsüingda lemsatsüla, ta takhangba agüja liasü aser ibaji ajanga party

telung nung mangatettep adoka liasü.

Chhattisgarh nung assembly elections agitsü ita pongu shi dang lia osangbener den jembidang

Baghel-i, "Congress süaka BJP süaka party ajaki CM leniba nung election atema nüboyimer. Opposition nung alidangbo lenir ka alakteta meshimi ajak longjemer nüboyimer," ta ashi.

Ajisüaka Baghel-i, pa CM candidate shimtsü mesüra meshimtsüji party nung bangdak lenirtemi dang telemtetba agitsü, ta ashi.

State pongu nung assembly elections aser Lok Sabha elections agitsü lia Congress Working Committee (CWC) nung züingsem tasenpurtem shimtsü.

Taküm February ita nung Chhattisgarh nung Congress-i anogo asemnü plenary senden ayongzüka agidang Congress working committee (CWC) nung züingsemtem shimtsü atema Steering Committee-i Congress Tir, Mallikarjun Kharge nem tashi agütsüogo, anungji CWC züingsemtem shimtsü atema election magitsü.



June 11, 2023 nü International Exhibition & Convention Centre, New Delhi nung tang mezüing ayongzüka akaba National Training Conclave nung Ato kilonser, Narendra Modi adenba noksa nung angur.



CAR MELA !!! CAR MELA!!! CAR MELA!!!  
DATE: 14TH-15 JUNE VENUE: IMKONGMEREN SPORTS COMPLEX  
DISCOVER THE LATEST CAR MODELS AND EXCITING FINANCING OPTIONS .  
DONT MISS THE OPPORTUNITY TO EXPLORE A WIDE RANGE OF CAR MODELS AND AVAIL ATTRACTIVE FINANCING OPTIONS . JOIN US FOR AN UNFORGETTABLE AUTOMOTIVE EXPERIENCE.  
Date: 14th - 15th JUNE  
Time: 9.00 AM to 4.00 PM  
Venue: Imkongmeren Sports Complex  
FOR MORE INFORMATION, CONTACT:  
1. 8132878449 , W.Onesimus , CM(SBD) RBO Mokokchung  
2. 9862299585 , Lanuienla Walling, Manager RBO Mokokchung  
MAKE YOUR CAR DREAMS A REALITY AT THE CAR MELA!!  
Organised by - SBI RBO MOKOKCHUNG

### EAM Jaishankar-i Germany aser Australia lenirtem den senden amen

**New Delhi, June 11 (Agencies):** Amongnü External Affairs Minister, S Jaishankar-i Germany Development Minister, Svenja Schulze aser Australia Foreign Minister, Pat Conroy na den senden balala mena linük tsüingda tesendaktep aser G20 framework kübok linük tsüingda amalitepa inyakba atema jembio.

Uttar Pradesh kübok Varanasi yimti nung G20 Development Ministers senden aliba mapang pai lenir ana denji jurila senden amen.

Tesülen Jaishankar-i twitter ajanga, "G20 Development Ministers senden tenzüka German Minister for Economic Cooperation & Development @SvenjaSchulze68 den senden amen. Künati #G20DMM dak sendakba onüktem nung o lemtep. Künatisa Sustainable Development Summit aser partnerships nung linük tasembuba aniokba indanga jemi," ta metetdaksü.

Australia Foreign Minister Conroy den senden amenba sülen Jaishankar-i twitter ajanga, tena senden amenba mapang nung tawa Ato kilonser, Narendra Modi-i Australia semdangba indanga süoka jembio, ta metetdaksü.

"Varanasi nung #G20DMM atema Australia Development Minister @PatConroy1 pelaa agizükogo. Künati tawa PM @narendramodi-i Australia

semdangba atema jemi. Künatisa linük anati Pacific nung terenlok atema inyaktetsü alibatem atema o lemtepogo," ta pai twitter ajanga metetdaksü.

Jaishankar-isa UN Conference on Trade & Development Secretary General, Rebeca Grynspan ajuruogo. Pai twitter ajanga, "#G20DMM senden aliba mapang @UNCTAD Secretary General, @RGrynspan ajuruogo. Global South nung tebilemtsü onük balala atema G20-i tongtibang shilem agir ta künati bangjemogo. SDG

nükjidongtem ataloktsü atema maneni amalitepa inyaktsü," ta metetdaksü.

Jaishankar-isa EU Commissioner for International Partnerships, Jutta Urpilainen den senden amenba sülen pai twitter ajanga, "EU Commissioner for International Partnerships

@JuttaUrpilainen den senden junga menogo. Künati G20 senden atema jemi. Künatisa India nung terenlok partnership ajanga inyakba Global Gateway tashi itshitsü atema jemi," ta ashi.

June 11-12 anogotem nung India-i G20 linüktem nungi development minister tem senden ayongzüka amener. Iba senden nung global supply chains, food & energy security aser climate change densema tongtibang onük aika lemteptsü.

### India nung coronavirus agi teshirangdakpur 2,450 dang kümogo

**New Delhi, June 11 (Agencies):** Tesüiba anogo ka tsüingda India nung nisung 140 dak dang coronavirus putet aser tang linük nung iba tashidak agi teshirangdakpur 2,450 dang kümogo, ta Amongnü Union Health Ministry-i metetdaksü.

Tesüiba ghonda 24 tsüingda linük nung iba tashidak agi shiranger ka dang asü (Kerala nung), aser tang tashi nung linük nung iba tashidak agi shiranger ajak senteper 5,31,891 süogo.

Tang tashi nung India nung nisung ajak senteper crore 4.49

(4,49,92,788) dak coronavirus putetogo, tang teshirangdakpur temji coronavirus caseload nungi shilem 0.01 dang lir aser iba tashidak agi shiranger anepba shilem 98.81 kümogo, ta health ministry-i metetdaksü.

Linük nung iba tashidak agi shiranger 4,44,58,447 anepogo, iba tashidak agi shiranger asüba shilem 1.18 dang lir aser coronavirus vaccine dose ajak senteper crore 220.66 agütsüogo, ta Union Health Ministry-i metetdaksü.



## TIR YIMYIM YIMOBILEM (EDITORIAL)

DIMAPUR TENTONÜ, AAMI (JUNE) 12, 2023

### Tzümetsüng masü motzü !

**A**sen kidanger Assam den medemdangra, Dimapur dena Naga lima ajunga ya tenem lima lir, anungji anogo piyong tzunglu aruyonga tzümetsüng adoka atsümbangtsüsabo masütsüsa Tsüngremi alinük ya ayong aser tenem agi sünga yangluja lir. Iba jagi asen lima nung tzunglu kanga sashia aruaka motzü ajak ayongayonga ayongleni yimzüka alur. Aji oda, Nagaland nung tzunglu sashia aruba agi tzümetsüng kümer Nagaland nung alir masü saka Assam lima lenden len alirtemang kangshir. Ajisüaka, tanübo Nagaland nung tzunglu minute ishika danga maneni arura, talisa Dimapur nungbo yimti yimdong awatsüng ama akümer aser kiyong aika nung ki aika tzu agi atsümbanger. Iba timtem yabo Assam len ama tzümetsüng adoka kiojen atsümbangba masü saka asen yimti, asen kiyong aser asen kima nungi motzü yimzüka aodak maka atsüngdenba agi ajuruba timtem lir. Ibaibo tzunglu tali aruba agi masü saka asenoki tenük amur ali nung morumorua inyakba ajanga atalokba timtemtem asütsü. Tang ama meiwa mapang tsünglu sashia arutsüla, kechiyong alu aser arem nung metsüjangnutsü aser süngdonglidongtem atema tzu nungdaker. Ajisüaka, tzunglu tilaka danga aru majung an ki aser ak ki dang masü saka asenok aliba ki dena metsümbangtsüsaba asenok lira, asenok asoshi tsünglu arua majung aser marua majung ta asüba tia ka nung teti timtema alitsü. Atangji, tzunglu aruba mapang motzü yimzüka moutet asen kidangi aittsüsa akümbaji asenoki asen alidak meketa kilentzü junga meyangluba ajanga asütsüsa akok. Aji dang masü saka tesem aika nung kilentzü yanglua liaka asenoki kilentzüji janaona endokdak kümer asen kilong aser kima nung oktenba jajaona ajak kilentzü nung endoker. Aji dang masü saka ano asenok lokti benjongbentsü aliba mapang janaona anungdenba ajak asenoki asen alidak anasa kilentzü mesüra ayonglen touka toktsür. Itemji tzunglu aruba mapang motzü agi nung moulutet tesem ka nung nangdener aser yangji motzüji awatsüng aser ayong küma atsüngdenba agi tzümetsüng akümer. Ibaji asenok teka agi yangluba tzümetsüng asütsü. Ashi, tzümetsüng yabo ayong nung tzu masem wanga atur ali tekongi adokba dang ajar. Ajisüaka, asenoki ajuruba tzümetsüng yabo ayong nung masem adokba tzu masü saka anunglen nungi aruba tzunglutzü agi ayong metongtet asen alidak atsüngdenba agi akümba tzümetsüng lir. Tang ama tzunglu aru shia asenok tzümetsüng timtem ajuruba ya kodang ano jungjunga bilemdangdir, asenoki kilentzü junga meyangluba aser kilentzü tangbangtsüsaba janaona endokba kisüng agibo masü saka timtem tenzüka tesem tulubajibo asenoki motzü yimzüka aluba ayong tilatem dena mali küma ali agi tokbanger iba madakji ki asür. Ibaji nung ta ashitsüsa asenok yimten ozüng amshir mali, anungji pei tashi agidang koka lira, yimti tiyong ajanga motzü yimzüka aoba ayong nungbanger ki asüyonga shingaia ola madoktsü. Tanü asen lima aser asen yimtitem topur raksaba dang masü saka asenoksasa asenok lendongi aitsüsa inyakba mapaji itemji lir. Talisa Dimapur amala nungbo awatsüng tulu tua yanglur yangji telidakpurtem dang masü saka raliwalirtem dena anisüngzüka südoksünema kazüdak yanglutsü melena akhidang nungi liasüba topur tajung awatsüngtem dena nungbanger ki yangluteper. Asenokbo alima nung aliba ya tanga kecha mapa atemaa masü saka ki asütsü asoshi alir amai, kodaser asen lima aser asen yimti topur junga yanglutsü aser asen lima ya tzümetsüng, menoknok aser yipru mopong lendongtem nungi kümzüka ayutsü ta bilema apayua inyaker masü saka sen dang ngurbo kilentzü tubanger ki asütsü; sen dang ngurbo ayong dena nungbanger iba madakji anung tonga tua ki yanglutsü; sen dang agizüka chiteterbo gari lenmang nungi motzü yimzüka alutsüsa kilentzü meyangluyonga ojang; sen dang ngurbo lenmang dang nungi kilentzü taka ser mashimashi yanglua yutsüyonga ojang ta sen sen dang bilema inyaker. Iba ama sen dang angatetba tangatetba ya tangsa tang pei lima aser pei yimti meimba shisatsü agi memelenshira, asenoki tanü asüng morumorua yangluba kiojentem yabo asen kinunger dang masü saka kidanger aser kiyonger dena anisemer asenok külemi tesama lendongi aitsü inyakba mapa ka dang asütsü.

## OLEMSABANG

### NAGALIMA TIA

- S. T. Yapang Lkr, Kohima.

Yaküm (2022) Rising People Party (RPP) ajanga totzü o kerosene na meyoktepba putetba asenoki osang kakat balala nung nguogo aser parnokisa iba maparen asoshi keno (FIR) mebenoktsü ta osang kakat nung züluba nguogo. Item RPP nübu aika ACAUT nung liasü, ACAUT nung aliba mapanga iba kasa inyakyim putetba asenok ajaki mamai alitsü ta amanger, anosa ACAUT teloki tashi ita inyaba kaji sensaker asoshi aruba jang posta dang melenshia seper sen timba agi yoktokba mapa putetba asenoki nguogo aser aikati yang to nübuttsüka shilem tajung agiogo, saka asenoki makok, aser ano makoktsü, ashiko Govt. mesüra linük tenzüker amala kar parnok den ali südi, yamaji masüasübo item tzümartem to Nagalima nung melitetla mesüra injang chir joko teret dang aser tenünga amatoker lila, saka parnok temo agi nongbanga yur tangu mesashiteter, tebok chizüka alur tang jakrep asotsü ama tebok temo agi nongbanga lir. Asenok nüburtem ayar, saka parnok tebok temo agi nongbanga yur mayar asünungji ayatsüba mozü (chi bangnanga chiyungnüttsüba mozü) sen taka agi alia jema kazür. Parnok ya asenoki azükarudaktsür aser asenoki takar kümdaktsür, onükji tanü ajak melemsateper.

Tamalen sensaker asoshi aruba jang yoktokba dak sentakba nungi ACAUT lennir kar pua tepuokdak ayu, iba asoshi nübur temulungeri mokdangba ayongzüka takangba agütsü, saka mekoktet, ano yamala bushidangtsü asoshi luden shimtsü nungdak mali, Govt. tashi bena alirtemi pei kinunger sorkar mapa nung küm semerpungu takaba ajak amuzüka chireptsür ano tenük masüng alir rogo kar ibala bushidangba luden nungji shimtsü aser küm piyong minister itasen den kasa agütsüa parnok olioraba sen ajak agütsür kecha masü tembangtsü, anungji kodangsa mapa tamajung ka atalokdir iba bushisüngdangtsü asoshi luden ka shimtsüla ta asüba ya tekolok aitba mapa masü. Khenkhen tebushidangeri junga bushiteta yutsüaka ibaji kodang obendang agütsüjar memetet.

ACAUT mesüra RPP puri kechiba yamala mapa tamajung inyakba ya miima Police nem magütsürar mesüra Police tsüngdang keno mebenokar iba tia aser alima jenjangji teinyakeri meteta lir, saka ali mesama tashi yamaisa alitsü tabo shingaia meshitet.

Joko asenoki item mapa tamajung inyakertem, totzü meyoktepa ayokba, jang yoktokba ano aika lirko, item inyaker ajak nem senpet narolang kaka dang agütsütsü tim, kechiyong asen Nagalima ama sensaker lima aser tebilemtsü agi sünger aliba lima nung parnoki sen menünger dang mesüka sen poktetdakttsüba mapa inyaker, anungji parnok dang ya kanga pelatsüla, kechiaser asenoki item tamajungpur anema anogo kata mapa meinyaki yimyim ayima mesenzütettsü, mesüra mokdangba anogo ter metsü shi ayongzüka mekazütettsü. Nisung ajak arishi piyong mazüngi alir, saka tangari tenükmesepshi nung temo mesepadoker alidak terep/tapung tagidak makaba nung mazüngteper asünungji nüburji tebok masünger. Asenoki item tamajung pur anema noktandang takoksa ajuruba rongsen ajakji asen dak nungisa tetemlok keter aluzüktsü, anungji item ashiauürtem ya azükarua alinung dang asen Naga nungger yimkong ajangzüktsü melen parnok sülen anidakertem ishika takar akümstsü, aser parnoki tenla agütsütsü ta alitsüba dang, tanga lenmang mali, kechiyong asen Aor shin o nung ashi ama auür süngsü tuluba.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# KLBC D. Block nung Youth Foundation Day ayongzüka among



June 11, 2023 nü Kohima Liangmai Baptist Church nung KLBC D.Block Youth Foundation Day amongdang pastor, Rev. N Silubo Zeliang Pastor-i tawa HSLC aser HSSLC tatidang nung takok angurtem atema sarasademsüdang tangokba noksa nung angur.

**Kohima, June 11 (TYO):** June 11, 2023 nü Kohima Liangmai Baptist Church D.Block nung Youth Foundation Day den külemi Liangmai Pastor Day of Prayer repsema mongogo, ta Rutmakbo Media Cell, Kohima Liangmai Baptist Church-i sangdong ka nung metetdaksü.

Kohima Liangmai Baptist Church Youth Foundation Day sentong nung tongti o jembirji Sunday School Superintendent, Wt. Phungben Kaurinta liasü.

Lai lanurtem dang, Khristan lanur ka ama pei tamendakdakji Yisu Khrista südaksütsüla aser tatishitsü tajung sayur kaka asütsüla, ta ayongzüka.

Laisa lanurtem dang Laishiba nung tera ayangtsü aser youth ministry nung lanurtem tsüngda tesendaktep tajung alitsü ayongzüka.

Laishiba nung aliba Yosef otsü nung ajemdaker lai lanurtem dang mapang ajak nung tatidang balala koktettsü ayongzüka.

Phungben-i lanurtem dang ochimashi nungi pilatsü, temeshi taküm alitsü aser tatidang balala koktettsü atema Tsüngrem dang nungi shisatsü meshitsü ayongzüka.

Youth foundation day anogomong sentong nungsa tawa HSLC aser HSSLC nung takok angurtem atema pastor, Rev. N Silubo Zeliang Pastor-i temoatsü meshija sarasadem.

Youth Foundation day sentong ya Youth Pastor, Kr. Kungkam leniba nung agia liasü.

# Sahel region nung Khristantem reshikangshi tamajungba akümer

**June 11, 2023:** Africa kübok Sahel region nung Khristantem reshikangshiba jenjang tamajungba kümdar, ta Khristan charity telok kati metetdaksü.

Release International-i report ka ajanga, alima nung Khristantem alitsü region tamajungtibatem rongnung Sahel region densema lir, ta metetdaksü.

Sahel region kübok Nigeria aser Burkina Faso linük nata densema lir.

Iba region nung Islamic kiralongrartem jenjang tajungba akümba ajanga Khristantem anema inyakba kanga bulua ataloker, ta report nung shia lir.

2022 küm piyong Nigeria

nung Boko Haram, Islamic State kiralongrartem aser Fulani kiralongrartemi Khristantem anema inyaka aruogo aser aika tepsetogo.

Release International nung Chief Executive, Paul Robinson-i, "Africa nung Islamic kiralongrartem tamajungba kümdar, aser parnokoki Khristantem meindoktsü meranger," ta metetdaksü.

Open Doors-ia, Africa continent nung Nigeria dang masü saka tangbo Burkina Faso, Mali, Cameroon, Niger, Mozambique aser Democratic Republic of Congo nunga Khristantem kanga

reshikangshir, ta metetdaksü.

Somalia nung al-Shabab teloki, parnokoki linük nung Khristantem meshimeshia samatsüner, ta sangdongogo. Iba linük nung tangbo Khristan nütsüng noklang ishika dang kümogo.

Alima nung Khristan tenet shia nungi kati reshikangshi ajangshir, ajisüaka Africa nungbo Khristan pongu shia nungi katibosa reshikangshi ajangshir, ta Open Doors-i metetdaksü.

2022 küm Nigeria nung Khristan 4,650 tepsetogo aser ibaji 2021 küm den medemdangra 1,000 agi teimba tepsetba lir.

# DRC nung kiralongrartemi Khristan 12 tepset

**June 11, 2023:** Brihostibarnü (June 8) Democratic Republic of the Congo (DRC) nung Allied Democratic Forces (ADF) kiralongrartemi tetsür-tanur densema Khristan 12 tepsetogo, ta International Christian Concern (ICC)-i metetdaksü.

Osangbener den jembidang Bukokoma area nung administrator, Katanga Matete-i, "Kiralongrartem jagi kishi kakpoker nok aser techira hadirtem agi nisungtem tekolak tangzüka lepset," ta metetdaksü.

Red Cross nung ketdangser, Albert Ndungo-i, kiralongrartem jagi techira hadir agi tetsür pezü aser tanurtem densema nisung 12 tepset, ta metetdaksü.

Tesüiba küm aika Congo

linük nung kiralongrar telok balalai nüburtem nem timtem agüja arudar. Congo nung kiralongrar telok tulutibaji ADF lir aser iba telok ya ISIS den affiliate süa lir. ISIS teloki Central Africa nung Islamic yimli amenoktsü nükjidong nung inyaker.

Congo linük nung Khristan nütsüng teimba lir. Iba linük nung nütsüng shilem 75 shibo Khristantem lir aser Khristantemji shilem asemi nungi shilem kabo Roman Catholic Khristantem lir. Congo nung Protestant Khristantemji teimbaka Evangelical Church nungi züngsemtem lir.

Islamic kiralongrar telok balalai Khristantem samatsütsü nükjidong nung mapang shia

Khristantem amaker.

Taküm March ita nunga anüdoklen Congo linük nung Khristan 72 tepsetogo. Mapang shia Khristantem amakba ajanga nisung meyirjang aika linük telung nung jenshia lir aser aika kidanger linük Uganda aser Tanzania-i jena oa refugees kümogo.

Voice of the Martyrs nungi Todd Nettleton-i, "Rara adokba area nungji Arogo 25 liasü saka tanübo Arogo 8 dang lir. Ano tanga denomination ka nungi Arogo 54 liasü saka tangbo 11 dang kümogo. Ajisüaka Tsüngremi Congo nung maneni mapa inyakdar. Reshikangshi ajangshiba Arogoi asen sarasadem nungdaker," ta metetdaksü.

# ANOGO ABEN TSÜNGREM DEN

## NAI BUSHITETANG ASER SHIANG

"Ne kidangi ne tembartem dangi oang, aser Kibubai na asoshi mapa koda tulu inyak, aser Pai koda ne dang yimlibilem, parnok dang shiang." Mk. 5: 19

Nisung ka temenen tanela agi pur aliba Yisu ajurua pa dak nungi temenen tanelaji adokdaksü aser ak daki aitsü mela. Iba talenba nungi chiokba otsü kidangi oa tembar dang ashitsü nüngloksü. Asen taküm nung Tsüngremi kechi inyaker ibaji ashitsüla kechiyong yamaji inyakba ajanga Tsüngrem Sentsüwangshidaksür, tangashir tem temoatsü angur aser asen taküm nunga Tsüngremi ajangba tali jangja tanela nunga temoatsü angur. Talangi moaka ana nung asen meketa alir dang shidi.

Mother Teresai India lima Calcutta nung mapa inyakba indang angashia, tetsür ka kanga temoatsü ngua tenzüksü asoshi tajungshiba tulu angu. Anungji lai Mother Teresa dangi shiti ka zülua la aruagi yaridi ta ashi. Mother Teresai meyipa züluba shiti nung "Nai ne Calcutta bushitetang" ta langzü.

Osang tajung Tsüngremi inyakba mapa indang talangi oa inyakbaji dang mission mapa masü saka pei ki, nübur aser ana nung alir dang ashitsü aser nungdakba pur bushiteta yaritsü ji asen mapa lir.

### SARASADEM:

*O Tsüngrem, Ne mapa angutsüsa kü nüklapokjang. Amen.*

# Manipur kübok yim ka nung Tenla kidang tantsür ka khaset

**Guwahati, June 11** Touthang aser (Agencies): Hokolbarnü Thongneh Haokip na khaki süoshi semer autorickshaw ka nung prangpong amer telok Kotlen-i aoba mapang kati Manipur nung nung Touthang khaset, Kangpokpi district kübok ta ketdangsertemi yim ka amakdang Tenla kidang arrshi küm 67 tantsür ka khaset; la den yimdaklir tangar anata khasetogo.

Imphal West nung BJP MLA, S Kebi Devi'er kima bomb ka apokba sülen mapang tatsüka tsüngda Khoken yim amakba mapang nungjisa nisung ana yiru.

Asürtemji Domkhohoi Haokip, Khaimang Guite aser Jangpao Touthang nung 1,700 aser jangjaogo. Prangpong amertemi amakba indang Tenla ki 121 mapang nungji rongdoktsüba den Domkhohoi bo Tenla kidang amoi oa liasü aser Guite par kima liasü.

Touthang aser Thongneh Haokip na khaki süoshi semer autorickshaw ka nung prangpong amer telok Kotlen-i aoba mapang kati Manipur nung nung Touthang khaset, Kangpokpi district kübok ta ketdangsertemi yim ka amakdang Tenla kidang arrshi küm 67 tantsür ka khaset; la den yimdaklir tangar anata khasetogo.

Thongneh-a injang agi tepi yiru saka jena otet; pa den Thangkhojang na injang agi yirua sepaitemi tenaprongla hospital-i anir ao.

Taküm May 3 nü Manipur nung rara adokba sülen tang tashi nung nisung 105 süogo aser nisung 45,000 dak tema relief camps nung jenoka lir.

Manipur nung ki 1,700 aser denomination balala indang Tenla ki 121 rongdoktsüba den külemi Khristantem meyong kiojen aika raksatsüogo.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Rangzük**

(v) nok mesüra süngrangtsü agi agizük (cut off by knife or saw)

\* Kiburi kishi tatembanglen tatsüka **rangzüka** endok.

**Ranoa**

(adv) shiranga dang aliba (sickly)

\* Ozü medemer Makokba **ranoa** dang alir.

**OLONG PAITEP # 6543**

Grid for crossword puzzle #6543 with numbers 1-24.

**TIPILEN**

- 1. Saku - (4)
6. Songjen - (7)
7. Mall/Tazüung - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüung kasa jatepba - (7)
25. Ki yangluba oset - (4)

**LANGTSÜNGLEN**

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüungdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. --- tatsü - (3)
12. Tebur kidong aser zünga kasa tsüungda jatepba - (4)
14. Pela agizükba tapu ka - (5)
15. Tenüung atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

**OLONG PAITEP # 6542 TELANGZÜBA**

**TIPILEN :**

- 1. Kasa, 6. Rangben,
7. Mait, 9. Poktet, 11. Ati,
13. Atasa, 16. Rür, 17. Rajang,
20. Lanu, 24. Nüngjem,
25. Süra.

**LANGTSÜNGLEN :**

- 1. Khu, 2. Süjak, 3. Onük,
4. Oba, 5. Anü, 6. Ratet,
7. Mozü, 8. Ita, 10. Tar, 12. Tinu,
14. Salem, 15. Aja, 18. Anünü,
19. Taju, 21. Ano, 22. Onü,
23. Kua.



Post ka atema advertise asüba candidate aiür ana aru. Tena rongnung Rosela ji onsara tobour tajung saka Maryla jibo onsarasa tobour tamajung liasü. Ibaji ngua Bossbai yamai ashir.

**Boss** : Nena prongla qualification kanga junger, aser iba mapa atema ka ang tetemsüba ka ang tetemsüba ta, anungji joko ni question kaka asüungdangtsü, shibai shitak langzütetdir laji shimtsü, khenyongi tema tereprangtsü apir meshimtsü, aji metetang.

Tamasa Miss Rose-i shiang. China population kwi?


**Rose** : 1400 millions sir.

**Boss** : Very good, Miss Mary-i shiang, China nunger population 1400 millions aliba ji nisung shia tenüung shiangjong.

**Miss Mary** : Tasaya!!

~ Lilir : WhatsApp

**Assam journalist kati Manipur osang prokshiba atema amokmerener**



**Guwahati, June 11, 2023**

(Agencies): Manipur nung tensa mejungi aliba mapang ka nung Assam kübok Guwahati nungi osangbener ka amokmerenogo.

Nisung kari Deputy Editor of India Today NorthEast (NE) aser Assam nung senior journalist Afrida Hussain amokmerener.

Sugnu, Manipur nung sepaitem aser 'Arambai' telungpurtem tsüungda khatepba osangtem lai tawa prokshiba atema amokmerener.

May 29 nü lai sepaitem aser

Arambai telungpurtem tsüungda khatepba osang prokshiba liasü ta Afrida-i ashi.

India Today indang prime-time bulletin nung iba osang den külemi nisungtemi prangpong abenba noksatem sayua liasü.

Lai iba osang ya India Today NE atema züluba liasü. Lai Imphal nung hotel-i aoba sülen nisungtem phone ajanga amokmerentsü tenzük. La amokmerenertem ya Meitei nunger aser ano tongti ketdangsur ka dena lir.

Ketdangsur jagi la dang iba osang atema lendongi aitsü ta

amokmerena liasü.

Aji dang masü saka nisung telok ka la anenzükba hotel kima nung adenshi aser parnoki la dang kechiba iba osang zülü ta asüungdang.

Iba mapang Afrida-i la lendongi aitsü akok ta bilemba agi la den temapur nem osang sangoktsü aser hotel takdang melentsü mepishia liasü.

Iba osang angashia police aru aser anepdang 1:00 ako tashi nung parnoki telok adenshia aliba senshidaktsü. Iba sülen ghonda ana lir Afrida-i tongtepba Assam Rifles telok ka arur la anien.

Afrida Hussain dangi phone ajanga kanga amokmerenba ajanga la tetsüba tia ka nung lir.

"Onoki ochi osang sangoktsütsü masü na? May 5 nü ni Manipur-i aoba aser Kuki telungpurtem indang osang züluba atema shingaiia mashishitep, saka kin ka indang osang prokshiba ajanga ni timtem ajurur" ta Afrida-i ashi.

**BTR nung 'Boro Liberation Army' ta ser telok tasen ka tentetogo**

**Guwahati, June 11, 2023**

(Agencies): Assam kübok Bodoland Territorial Region (BTR) nung Boro Liberation Army ta ser telungpur telok tasen ka tentetogo.

'Boroland' state kümtettsü takhangba agüja BTR nung onok telok tasen tenteter, ta BLA-i Assam aser India sorkartem dangi shidi ka

züluba nung shia lir.

BLA telok nung tongti züngsemtemji B Dwidengra (President), B Rwngrwa (Vice President), B Ankhilai (Army chief) aser B Bwkhangsa (General Secretary) nunger lir.

January 27, 2020 nü BTR peace accord tasembuba nung sign sütepba sülen

Bodoland nung yimjung tensa aru.

Ajisüaka, BTR agreement nung sign süteper küm ana ser tesadang ka lir telungpur telok tasen ka tentetogo.

B. Daidengra lenisüba kübok telungpur telok tasen tentetba osang ya February ita WhatsApp group balala nung prokshia liasü.

**Assam nung NIA-i jihadi mapa inyaker nisung 4 apu**

**Guwahati, June 11, 2023**

(Agencies): Assam kübok Goalpara aser Bongaigaon district tem nung National Investigation Agency (NIA) ketdangsurtemi jihadi maparen inyaker nisung pezü puogo.

Parnoki Goalpara nung kiralongrar 3 aser Bongaigaon nung ka apu. NIA telok kati Hokolbar

nungi iba maparen tenzük aser Honibarnü jihadi maparen inyaker apu ta ketdangsur kati ashi.

Goalpara nung apuba nisung asemji Abdus Suwahan, Jalauddin aser Abdus Suwahan nunger ta jangaago ta police-i ashi.

Ano, Bongaigaon nung apuba nisungji Hafizur Rahman ta jangaago.

Hafizur Rahman ya Goalpara nung aliba Markazul Ma Arif Qariana Madrasa nung tesayur ka lir aser pa ya yaküm August 26 nü kiralongra mapa inyakba atema tai tonglokja pua liasü.

Iba sülen Assam sorkari madrasa shibangtsü. Rahman ya tepuokdak yua liasü aser anogo ishika tejakdang pa bail nung chiok.



Assam nung opposition party 12 nungi teshimtet telok kati Honibarnü Governor Gulab Chand Kataria nem Assam nung tensa mejungi akümba atema memorandum ka agütsüandang agiba noksa angur. Congress Legislature Party leader Debabrata Saikia-i aniba opposition teloki Governor Kataria dang police ketdangsur Junmoni Rabha taitüsü keta asüba indang ken o benok aser iba atema pa dang mapa inyaksü ayongzük. Governor-isa Chief Minister Himanta Biswa Sarma den osang lemsatepa nungdakba mapa inyaksü nangzük.

# Pakistan nung tzünglu sashia aru, nisung 20 dak tema süogo



Islamabad, June 11 : Iba noksa ya June 10, 2023 nü mobile phone ajanga tangok, kong Pakistan northwest tsütsü Bannu tesem nung mozüki ka kima ambulance tem anena aliba angur. Pakistan northwest tsütsü Khyber Pakhtunkhwa (KP) province nung tzünglu sashia aruba dak sendakba lendong balala nung nisung 25 süogo aser 145 yiru, ta KP indang Provincial Disaster Management Authority (PDMA) ajanga ashir.

**Islamabad, Aami/June 11 (Agencies):** Pakistan northwest region tem nung tzünglu kanga sashia aru ki chirep aser nisung 25 takum samaogo.

Honibarnü tzünglu aser rer agi Khyber Pakhtunkhwa province kübok Bannu, Lakki Marwat, aser Karak district tem nung kongshi, ta senior rescue officer Khateer Ahmed-i ashi.

Tsüngtong tera makepa laodang electrical transmission towers tem laodaktsü aser nisung 145 yiru.

Yirur alirtem nem ketdangsur temi emergency teyari agütsür, ta Ahmed-i ashi. Taoba ita meyi nung 'snow' tsüka anenzüka aluba mapang tetsür tanur densema nisung

ter dak tema asü.

Yipru ajanga asüba atema Pakistan Ato Kilonser Shahbaz Sharif-i Honibarnü asükuh lemsatepa liasü aser ketdangsurtem dang teyari agütsüba maparen tekeraba nung inyaktüsü totuyuba agütsü.

Ano Arabian Sea nungi Cyclone Biparjoy tonga aruba mapang Sharif-i ketdangsurtem dang renema alitsü metetdaktüsü.

Iba cyclone nung ghonda ka nung kilometre 150 tashi kera aonba mopung dena lir aser linük south tsütsü arur, ta Pakistan indang disaster management agency ajanga ashi.

Tzünglu kanga sashia aruba ajanga Pakistan nung taoba

küm tzümetsüng tesashitiba adoka liasü. Iba mapang tanur 647 densema nisung 1,739 asü aser nisung million 33 dak kongshia liasü.

Iba tzümetsüng tialong nung "monsoon on steroids" ka adoka linük shilem asem kuma sadangba nung shilem ka tzü agi mubanga liasü, ta UN tekolakba Antonio Guterres-i shia liasü.

Iba lendong timtem yagi water system timba raksaja tanur million 2.5 densema nisung million 5.4 dak tema tzütu aser tzübo nung aliba tzü tamajung ajemtsüsa akum.

Alimar lendong nung yariteptsü asoshi Hokulbarnü benokba budget nung sorkari sen billion \$1.3 lemezükja liasü.

# Russia nunger den meyiper rara tenzükogo: Zelenskyy

**Kyiv, Aami/June 11 (Agencies):** Ukraine Tor Volodymyr Zelenskyy-i ashiba agi, Russian sepaitemi par linük amakba anema meyiper rara tenzükogo, saka iba dak tali osang tejangja magütsü.

Ukraine leniri iba o ya Honibarnü Kyiv nung osangbener senden ka nung ashi, aser iba mapang pa anasa Canada Ato Kilonser Justin Trudeau nokdaka liasü.

Anogo ka tejakdang Russia Tir Vladimir Putin-i sangdong ka nung Ukraine-i meyiper rara tenzükogo aser Ukraine sepaitem kanga akoksadar ta ashiba atema asüngdangba langzudang pai iba ya ashi.

"Ukraine nung 'counteroffensive, defensive action' tem agidar. Koba jenjang nung aliar ajibo ni mejembitsü. Ni anogoshi tesem balala nung asen mitkar lenirtem den jembir. Ajak junga lir. Ibaji Putin nem angashidakjang," ta pai Ukraine mitkar lenir pongu tenung tetsüsha ashi.

Ukraine ketdangsur temi

tashi ajak amshia meyiper raraba sangdongtsü lia anen, saka nungdak nung amshitsü yua aliba sepaitem amshiba ajanga rara tenzükogo, ta Western analysts temi shia liasü.

Zelenskyy-i aonungshi video ajanga jembia aruba mapang sepaitem dang maneni raratsü ajungshi.

"Shirnoki pei aliba tesem metoktsü lir aser shirnoki takok nguyonga aor, nenok ajak dang kanga pelar," ta pai eastern aser southern fronts athishia ashi, kong rara tesashiba lir.

Ukraine indang general staff ajanga ashiba agi, par sepaitemi Bakmut aser Marinka temeket nung tsükchir temi amakba aridokogo, koba linük anüdoklen kanga sashia raraba tesem lir. Russian sepaitem maneni kanga sashia akoksar, koba parnoki miimbangtsü meranger, ta parnoki ashi.

Raraba tongpang mümerektet tashi mitkar temi sangdong kecha magütsütsü, ta Deputy Defence Minister

Hanna Maliar-i Telegram nung indang-indanga ashi.

Linük south aser east tsütsü Russia nungeri amokbanga aliba tesemtem tanaben rakzüksü asoshi meyiper raratsü sentong lir, ta Ukraine-i ita aika jembia aru. Saka parnoki iba inyakyim indang khenyongi mejembir aser parnoki operation tongtipa matenzük ta shia liasü.

Kasa mapang United Kingdom indang Ministry of Defence ajanga ashiba agi, tesüba ghonda 48 tsüngta linük anüdoklen aser southern tsütsü Ukraine-i operation tesashi agi aser tesem kar nung Russian defences raksa.

"Tesem kar nung Ukraine sepaitemi takok ngua Russian defences indang mezüngbuba 'line' telungi yiogo. Tesem kar nung meilongi takok ngua aor aser Russia mitkartemi raraba nung takok aser tamakok lir," ta ashi.

"Russian unit kari manoeuver defence operations agir amai lir aser kar meyipa aor, aser parnoki mine rema

**ALI TAYOKTSÜ LIR**  
AT SEITHEKIMA (A) Near Nagamese Church  
Dry Land, Rs. 95 Per Sq.ft (Negotiable)  
Plot size available as per your budget.  
Contact: 9612448446 / 8974571416

# Honduras-i China nung embassy lapokogo

**Beijing, Aami/June 11 (Agencies):** Beijing den tesendaktep yaglutsü atema Taiwan den tesendaktep raksaba sülen Honduras-i Beijing nung embassy ka lapokogo, ta Chinese state media sangdong ka ajanga metetdaktüsü.

Deobar anepdang embassy lapokba sentong nung China Foreign Minister Qin Gang aser Honduras Foreign Minister Enrique Reina nati shilem agia liasü, ta China indang official CCTV sangdong ka ajanga metetdaktüsü. Honduras-i ano teti atema embassy amenoktsü asoshi tesem memesemtetli aser staff tema timba kümdaktüsütsü, ta kasa sangdong ajangsa metetdaktüsü.

Qin-i, China-i Honduras den tesendaktep asoshi model tasenka benoktsü ta tenangzükba agütsüogo, ta China indang foreign ministry-i ashi.

Honduras tir Xiomara Castro-i anogo trok atema China semdangba mapang linük ana tsüngda tesendaktep akangshiba temaitsü iba embassy lapokogo.

Honduras-i China den March ita tesendaktep yanglu aser Taiwan den tesendaktep raksaba linüktem rongnung ka aküm. China-i Taiwan ya parnok kübok province ka ta züngshir aser nungdak dak süra tashiyim agi atsüngtsü ta shia arudar.

China-i parnok den sendaktepa aliba linüktem Taipei den tesendaktep ayutsü memelar.

Castro ya Hokolbarnü Shanghai tonga ao, koba linük ana tsüngda tesendaktep yangluba sülen lai China mezüngbuba semdangba lir. La Shanghai nung anenzüker aliba mapang Development Bank tasenba headquarters semdanga liasü. Development Bank tasenba ya BRICS kübok aliba linüktemi amenokba lir, kong Brazil, Russia, India, China aser South Africa densema lir. Honduras-i bank nung adentsü atema temepeshiba ka agütsüogo, ta Castro indang office-i Honibarnü tweet asü.

Tir-isa, technology giant Huawei indang research centre ka semdang aser iba sülen Honibar aonung Beijing-i oa liasü, ta China indang official Global Times osang kakat ajanga metetdaktüsü.

Beijing aser United States na Taiwan densema ken o aika nung toktepba mapang ka nung March ita Honduras den tesendaktep yangluba ya China asoshi takok ka lir. Iba ajanga Latin America nung China kanga nungtugu akümba sayur.

1949 küm civil war ka adoka China aser Taiwan na pilaba sülen tang tashi mangatettep adoka arudar aser China-i "one China" policy agizükdaktüsütsü atema billion aika intoka arudar.

aliba ajanga parnok aodang sepai aika asüba osang lir," ta UK Defence Ministry ajanga ashi.

Ukraine-i meyiper raraba mapang West ajanga training agütsüba sepai meyirijang aika parnoki hadir agüja aliba amer raratsü imlar, saka Russia-i parnoki rakzüka aliba tesemtem nung 'fortification' tem yanglur aser Kyiv ya anüng nung tashi ajema lir.

Ukraine-i linük south tsütsü temolung agütsütsü amai ajiteter, kong paroki Europe indang nuclear power plant tanaben agitsü aser Russia-i rakzüka aliba Crimea den apu ama aliba alinük rakdaktüsü merangtsü, koba ajanga Russian sepaitem sadangtsü.

Mongulbarnü Dnipro River nung yangua aliba Kakhovka tzü nokdang raksatsüba sülen yangji raraba nung temolung tali agütsür.

Iba tzü nokdang rakoka tzü muteta adokba ajanga nisung meyirijang aika pei ki yutsür tesem balalai jena aotsüsa akum. Iba tzü nokdang ya

Russia-i poksatsü ta Ukraine-i ashir. Moscow-i Kyiv dak tai tongloktsür.

Iba tzü nokdang raksar bendanger lenirtem rongnungi Ukraine semdangba nisung mezüngbubaji Trudeau alitsü aser pai senotsü, mitkar tsütsü aser ano shisatsü agi yaria liasü.

2022 küm February ita iba rara tenzükba sülen Canada-i Ukraine nem teyari sen billion \$6 dak tema agütsüogo aser ano pai mitkar nem sen million \$375 agütsütsü nangzük aser tzümetsüng adoka aliba mapang nüburttem yaritsü asoshi sen million \$7.5 agütsütsü sangdong.

UK sorkaria tzümetsüng agi kongshia alirtem nem sen pounds million 16 (\$20m) agütsütsü ta shiogo.

Item sen ya timba Red Cross aser United Nations ama international organisations ajanga aiter. UK-i ano rongtila, community water filters, water pumps aser tzü mamungba tsüngsem tem Ukraine dangi yoker.

## Australia-i World Test Championship kokogo



**Aami/June 11, 2023 (Agencies):** World Test Championship (WTC) final nung Deobarnü

tatembangbuba anogo asaya nung Australia-i run 209 agi India madak takok nguogo.

Australia-i target 444 yanglua toktsüba sülen tatembangbuba anogo asaya akoktsü atema run 280 nungdak India team batting amen tenzük. India team-i asayar 3 out ser run 164 yanglur Honibarnü asaya tembang aser Deobarnü Virat Kohli aser Ajinkya Rahane na maneni batting ameni aita liasü.

Ajisüaka Scott Boland aser külem Australia nung bowler temi India nung asayartem

kanga atonga out sütsü aser tatembangbuba anogo lunch break matong tsüngda run 234 agi asaya koka liasü.

Deobarnü over 7buba nung Boland-i ball aonba mapang Kohli-i edge sür yokba ball ka Steve Smith-i kanga junga pua pa run 49buba nung out süatok. Iba sülen kasa over nung Boland-i Ravindra Jadeja out süja liasü.

Asaya nung Kohli out asüba sülenbo Australia-i asaya koba tang mezüngbuba world test championship akoktsü tejanga aküm.

Rahane-i Honibar aonung run 20 yanglur liasü aser paia junga masayateti run 46 dang yanglutet. Pa out asüba sülen India nung wicket pongu

anunga aliba ya lunch break atongtsü minute 30 anunga lia ajak out süma.

Iba Test asaya nung Boland-i kanga junga asaya wicket ana agi aser Mitchell Starc o Nathan Lyon natia wicket anana agia liasü. Asaya nung Wicketkeeper Alex Carey-i catch pezü süa liasü.

Final asaya tatembangbuba anogo India nung tatembangbuba asayar teneti run 70 dang yangluteta liasü.

Australia team-i mapang talangka International asayamung ka danga mekoki arur tang iba asayamung final kokogo. Kasa mapang nung India team tang agi tanabenbuba WTC final nung tamakok nguogo.

## Chaliha aser Ravi nati Maldives International Challenge kokogo

**Monupii/May 11, 2023 (Agencies):** India nung badminton asayar Ashmita Chaliha aser Ravi nati Male nung asayaba Maldives International Challenge nung tebur aser tetsür kija asaya kokogo.

Tetsür final asaya nung third seed asayar Ashmita-i set ka mekoki aliba nungi meyipa arur 19-21, 21-17, 21-11 agi külem India tsür Tasnim Mir madak takok ngua liasü.

Assam tsürta yagi tang agi tasembenbuba BWF International Challenge kokogo. Lai taoba mapang Tata Open India International

aser Dubai International asayamung koker liasü.

Tebur kija asaya final nung unseeded asayar Ravi-i Malaysia nung seventh seed asayar Soong Joo Ven 21-19, 21-18 agi straight games nung koka liasü.

Kasa asayamung nungsa Top-seeded India tsür tarep asayar Ashwini Bhat aser Shikha Gautam na tanabuba jenjang nung tembanga liasü.

Tetsür tarep asaya final nung Ashwini aser Shikha na ya Thailand tsür Laksika Kanlaha aser Phataimas Muenwong nati 22-24, 15-21 agi koka liasü.

## Junior Asia Cup Hockey: India tetsür team-i title benogo

**Aami/June 11, 2023 (Agencies):** India junior women's hockey team-i linük nem kongnang tetushi bener aruja Deobarnü Japan nung Junior Asia Cup asayamung kokogo. Parnoki final nung Korea goal 2-1 agi koka liasü.

Asaya nung India tsürtem rongnungi Annu aser Neelam nati goal kaka idakja parnoki asaya akok aser takok marok ajungketogo.

Iba asayamung nung Annu nem top scorer naroküm agüja liasü. Lai asayamung tepeyong kanga junga asaya India team nem teyari agütsüogo.

Asaya mezüngbuba quarter nung Annu-i India team atema goal ka idakja parnok tejakdang toktsü, ajisüaka mapang tatsüka dang lir Korea team atema Park Seoyeon-i goal ka idakja goal kasasa aküm.

Tanabuba quarter nung

team kati danga mamokbani kanga toktepa asayaba sülen goal 1-1 nung halftime atong.

Ajisüaka tasembuba quarter nung Neelam-i India atema goal ka idakja parnok tera agi tejakdang aküm.

Asaya tatemlen Korea-i goal idaktsütsü asoshi mapang kar nung amokmerenaka India team-i kanga junga nokdang aser iba tetushi asayamung koka liasü.

Iba asayamung nung India team-i Uzbekistan team goal 22-0 agi koka tenzük aser iba sülen Malaysia 2-1 agi akok.

Pool A nung league asayaba mapang Korea aser India na goal 2-2 nung tembang aser iba sülen tatembangbuba asaya nung parnoki Chinese Taipei koka liasü.

Semifinal asaya nung India team-i kanga meranga asayar Japan goal 1-0 agi koka final atong aser takok ngutetogo.

## Manchester City-i UEFA Champions League kokogo



**Aami/June 11, 2023 (Agencies):** Honibarnü Istanbul kübok Ataturk Olimpiyat Stadium nung Inter Milan goal 1-0 agi akokba sülen Manchester City-i tang mezüngbuba Champions League kokogo.

Asaya nung minute 68buba nung Rodri-i goal ka idakja parnoki iba asaya akok. City-i taküm Premier League aser FA Cup-a koka lir aser tang CL koka asayamung tongtibang asemprongla kokogo.

City-i tang mezüngbuba Europe nung club tem tetoktepa tulutiba kokogo, ajisüaka Pep Guardiola-ibo iba asayamung ya coach ama tang

agi tasembenbuba kokogo.

Asaya mezüngbuba shilem nung City nungi kanga tongtibang asayar Kevin De Bruyne yiruba ajanga masayatetsüsa kümaka parnoki iba asaya kokogo.

Iba asayamung akokba tetezü parnoki Europe nung asayamung tulutiba akoktsü nükjidong aliba atalokogo.

City kibur Sheikh Mansour bin Zayed Al Nahyan-a par team-i takok marok ajungketba mapang densema liasü. Küm 15 tsüngda pai tang agi tanabenbuba-ang par team asayaba repranga liasü.

Asaya nung Romelu Lukaku-ia goal ka idaktsütsü

asoshi maongka angu, ajisüaka pai tongoktsüba ball ya City goal keeper Ederson dangi indang indanga oa liasü.

City asoshi Rodri-i goal ya Bernardo Silva-i agütsüba ball ka kanga junga agizüka penalty box telung nung asayartem mesemi nongtepa aliba mapang idakja liasü.

Mezüngbuba goal idaktsüba sülen minute ishika tsüngda Inter-ia goal idaktsütsü asoshi maongka angu, ajisüaka Federico Dimarco-i metsüba ball bar nung ondak.

Iba sülen bar nung ball ondaker adokba ya pai tanaben metsüoktsü saka par teammate Lukaku dak tsükdaka liasü.



Poland tsürs Iga Swiatek-i French Open tennis tournament tetsür kija asaya final nung Czech Republic tsür Karolina Muchova 6-2, 5-7, 6-4 agi kokogo. Swiatek ya Justine Henin sülen Paris nung iba asaya küm ana atonga akokba mezüngbuba asayar kümogo.

**BILEMDANGANG**  
"Timtem tekangshi ajanga nisung ka kümkümdaktsür."